



REPUBLIKA E SHQIPËRISË  
KËSHILLI I EMËRIMEVE NË DREJTËSI

VENDIM

Nr. 25, datë 16.09.2020

**PËR LEJIMIN E KANDIDIMIT TË ZOTIT ALTIN BINAJ NË VENDIN VAKANT  
PËR GJYQATAR NË GJYKATËN KUSHTETUESE, SHPALLUR NGA PRESIDENTI  
I REPUBLIKËS NË DATËN 22.11.2019**

Këshilli i Emërimeve në Drejtësi, i përbërë nga :

<b>Vitore Tusha</b>	- Zëvendëskryetare
<b>Fiona Papajorgji</b>	- Anëtare
<b>Arta Marku</b>	- Anëtare
<b>Miranda Andoni</b>	- Anëtare, Relatore
<b>Saida Dollani</b>	- Anëtare
<b>Ludovik Dodaj</b>	- Anëtar
<b>Fatjona Memçaj</b>	- Anëtare
<b>Arjan Qafa</b>	- Anëtar

Asistuar nga sekretare Dorina Dulaj,

Me praninë e Avokates së Popullit, zonjës Erinda Ballanca, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- zotit Bledar Dervishaj dhe zonjës Katrin Treska, përfaqësuesit e autorizuar të Presidentit të Republikës,

- zonjës Mimoza Arbri, përfaqësuese e autorizuar e Kryetarit të Kuvendit,

**në mbledhjen e datës 16.09.2020**, mori në shqyrtim çështjen që i përket:

**KANDIDATI PËR GJYQATAR**

**NË GJYKATËN KUSHTETUESE:      Zoti Altin Binaj**

**OBJEKTI:**

**Urdhërimi i lejimit të kandidimit të zotit Altin Binaj në vendin vakant për gjyqtar në Gjykatën Kushtetuese, shpallur nga Presidenti i Republikës në datën 22.11.2019.**

## KËSHILLI I EMËRIMEVE NË DREJTËSI

Pasi dëgjoji relatimin e anëtares së Këshillit, zonjës **Miranda Andoni**, mendimin e paraqitur nga Avokati i Popullit, zonja Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

### VËREN:

#### I. Rrethanat e çështjes

1. Në zbatim të nenit 125 të Kushtetutës dhe nenit 7/b të ligjit nr. 8577, datë 10.02.2000 “Për organizimin dhe funksionimin e Gjykatës Kushtetuese të Republikës së Shqipërisë” (*në vijim ligji nr. 8577/2000*), Presidenti i Republikës, në datën 22.11.2019, ka shpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese pas mbarimit përpara kohe të mandatit të gjyqtarit Besnik Muçi.

2. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.

3. Ndërmjet kandidatëve që kanë shprehur interesin për plotësimin e këtij vendi vakant të krijuar në Gjykatën Kushtetuese është edhe zoti Altin Binaj.

4. Në zbatim të nenit 228 të ligjit nr. 115/2016 “Për organet e qeverisjes së sistemit të drejtësisë” (*në vijim ligji nr. 115/2016*) dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2, datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si edhe të pikës 4 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, në të njëjtën ditë të mbledhjes së zhvilluar në datën 15.01.2020, është realizuar edhe procedura për caktimin me short manual të relatorëve për vendin vakant të krijuar në Gjykatën Kushtetuese.

5. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, të shpallur nga Presidenti i Republikës në datën 22.11.2019, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, zonja Miranda Andoni.

6. Zoti Altin Binaj, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, është njoftuar me shkrim për tu paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike datë 16.01.2020, në adresën e deklaruar nga vetë kandidati Altin Binaj, gjendet i administruar në dosjen e kandidimit.

7. Në datën 20.01.2020, kandidati Altin Binaj është paraqitur pranë Këshillit të Emërimeve në Drejtësi dhe është pajisur me formularët e deklaramit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit të Deklaratës përkatëse, e cila gjendet e administruar në dosjen e kandidimit.

8. Në datën 27.01.2020 kandidati Altin Binaj ka depozituar në sekretarinë e Këshillit të Emërimeve në Drejtësi formularë të deklaramit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidimi.

9. Duke qenë se kandidati Altin Binaj është prokuror, ai është njëherazi edhe subjekt i rivlerësimit kalimtar të gjyqtarëve dhe prokurorëve. Për rrjedhojë, Këshilli i Emërimeve në Drejtësi, për sa i përket vlerësimit dhe kontrollit të pasurisë dhe të figurës, merr parasysh konkluzionet e realizuara nga Komisioni i Pavarur i Kualifikimit. Ky i fundit, me vendimin nr. 101, datë 23.01.2019 ka vendosur konfirmimin në detyrë të subjektit të rivlerësimit, Altin Binaj, prokuror dhe drejtues pranë Prokurorisë së Apelit Vlorë, vendim i ka marrë formë të prerë, në datën 12.03.2019. Sipas Kushtetutës dhe ligjit nr.84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë” (në vijim ligji nr. 84/2016), vendimet për konfirmimin në detyrë të subjekteve të rivlerësimit jepen për të tre komponentët e kontrollit: vlerësimin pasuror, vlerësimin e figurës dhe vlerësimin profesional.

10. Këshilli i Emërimeve në Drejtësi, në pikën 105 të Vendimit nr.4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, ka përcaktuar se: “Kandidatët magistratë dhe subjektet e tjerë që i nënshtrohen procedurës së rivlerësimit kalimtar sipas ligjit nr. 84/2016, të cilët janë konfirmuar në detyrë me vendim përfundimtar nga organet e rivlerësimit kalimtar, nuk i nënshtrohen procedurës së verifikimit të pasurisë dhe të integritetit, të parashikuar nga nenet 235 dhe 236 të ligjit nr. 115/2016.”.

11. Në pikën 110 të vendimit nr. 4, datë 11.03.2019 thuhet se: “Nëse procedurat e verifikimit të kushteve dhe kriterëve të tjera ligjore të kandidatëve magistratë dhe subjekteve të tjerë që i nënshtrohen procedurës së rivlerësimit kalimtar sipas ligjit nr. 84/2016, fillojnë pas afatit 180 ditor të përcaktuar nga pika 2 e nenit 3/1 të ligjit nr. 9049/2003, procedura e verifikimit të pasurisë së këtyre kandidatëve shtrihet mbi interesat pasurore, private dhe konfliktin e interesit, për periudhën pas asaj të datës që ka marrë formë të prerë vendimi i dhënë nga organet e rivlerësimit kalimtar për konfirmimin e tyre në detyrë”.

12 “Afati 180 ditor i përcaktuar nga pika 2 e nenit 3/1 të ligjit nr. 9049/2003, lidhur me kryerjen e procedurës së verifikimit dhe kontrollit të plotë të pasurisë së kandidatëve magistratë dhe subjekteve të tjerë që i nënshtrohen procedurës së rivlerësimit kalimtar sipas ligjit nr. 84/2016, sipas pikës 109 të vendimit nr.4, datë 11.03.2019 llogaritet nga dita e dorëzimit të plotësuar të deklaratës së pasurisë dhe interesave private të kandidatit pranë ILDKPKI.”.

13. Këshilli vlerëson të evidentojë se në lidhje me kandidatin Altin Binaj, subjekt që i nënshtrohet procedurës së rivlerësimit kalimtar sipas ligjit nr. 84/2016, ka kaluar afati 180-ditor i përcaktuar nga pika 2 e nenit 3/1 të ligjit nr. 9049, datë 10.04.2003 “Për deklarimin

dhe kontrollin e pasurive, të detyrimeve financiare të të zgjedhurve dhe të disa nëpunësve publike” (në vijim ligji nr. 9049/2003), ndaj procedurat e verifikimit do të shtrihen mbi interesat pasurore, private dhe konfliktin e interesit, për periudhën pas datës që ka marrë formë të prerë (12.03.2019) vendimi i dhënë nga organet e rivlerësimit kalimtar për konfirmimin e tyre në detyrë.

14. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e pasurisë, në zbatim të shkronjës “dh” të nenit 7/a të ligjit nr. 8577/2000, të nenit 235 të ligjit nr. 115/2016, si edhe në zbatim të pikave 60, 105, 109 dhe 110 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, me shkresën nr. 34 Prot., datë 30.01.2020, Këshilli i ka dërguar ILDKPKI-së listën e kandidatëve dhe personave të lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit, sipas ligjit nr. 8577/2000 dhe ligjit nr. 115/2016.

15. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe Deklarata e nënshkruar nga kandidati Altin Binaj, ku tregohet se është pajisur me formularët e deklarimit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës.

16. ILDKPKI-ja, në zbatim të nenit 235 të ligjit nr. 115/2016, të ligjit nr. 9049/2003 dhe ligjit nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike” (në vijim ligji nr. 9367/2005), me shkresën nr. 130/25 Prot., datë 04.03.2020, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Altin Binaj dhe personat e lidhur me të. Në shkresën e ILDKPKI-së, faqe 4, paragrafi. 1, rezulton se kontrolli është ushtruar për periudhën pas datës së dorëzimit të deklaratës së Rivlerësimit Vetting, deri në datën e dorëzimit të deklaratës së pasurisë dhe interesave private të kandidatit për anëtar në Gjykatën Kushtetuese dhe konkretisht për periudhën 31.01.2017 deri në 30.01.2020, që përfshin deklaratat e interesave private periodik Vjetor 2017, periodik Vjetor 2018 dhe deklaratën e pasurisë së kandidatit. Në përfundim të analizës së hollësishme financiare është konkluduar se:

- a) Deklarimi është i saktë në përputhje me ligjin.
- b) Ka burime financiare të ligjshme për të justifikuar pasurinë.
- c) Nuk ka kryer fshehje të pasurisë.
- ç) Nuk ka kryer deklarim të rremë.
- d) Nuk gjendet në situatën e konfliktit të interesave.

17. Gjithashtu, në funksion të ushtrimit të kompetencave të tij për verifikimin e plotësimit të kushteve dhe kriterëve ligjore të kandidimit, për sa i përket kontrollit të pasurisë, në zbatim të pikës 4 të nenit 229 dhe 235 të ligjit nr. 115/2016, të shkronjës “e” të pikës 20, 24, shkronjës “b” të pikës 60 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, edhe ky Këshill ka kryer veprimet verifikuese të kërkimit nga subjekte publike dhe private, të të dhënave mbi pasuritë, interesat private dhe

detyrimet financiare që ekzistojnë në emër dhe për llogari të kandidatit Altin Binaj dhe personave të lidhur me të.

18. Për realizimin e veprimeve verifikuese të lidhura me kontrollin e pasurisë së kandidatit Altin Binaj, Këshilli i Emërimeve në Drejtësi, në datën 18.02.2020 dhe datën 19.02.2020, i është drejtuar me kërkesa për informacion dhe ka marrë përgjigjet përkatëse me të dhënat e kërkuara nga secili prej institucioneve publike dhe subjekteve private (të cilat janë administruar në dosjen e kandidimit), si vijon:

- a) Institucioneve bankare: (1) Banka Alpha Albania, (2) Banka Amerikane e Investimeve, (3) Banka Credins, (4) Banka e Bashkuar e Shqipërisë, (5) Banka e Parë e Investimeve, (6) Banka Intesa Sanpaolo, (7) Banka Kombëtare Tregtare, (8) Banka Procredit, (9) Banka Raiffeisen, (10) Banka Societe Generale, (11) Banka Tirana dhe (12) Banka Union.
- b) Institucione financiare të licencuara nga Banka e Shqipërisë : (1) Ak-Invest, (2) Albania Leasing, (3) Capital Invest, (4) Easypay sh.p.k, (5) Final sha, (6) Fondi Besa, (7) Iutecredit Albania, (8) Landeslease, (9) M – Pay sh.p.k. (10) NOA sha, (11) Porsche Leasing, (12) Posta Shqiptare, (13) Raiffeisen Leasing, (14) Tirana Factoring & Lease, (15) Tranzit sha, (16) Union Financiar Tiranë.
- c) Subjekte financiare të licencuar nga AMF : (1) Fondi i Pensionit Vullnetar Credins Pension, (2) Fondi i Investimit Credins Premium, (3) Fondi i Investimit Raiffeisen Invest Euro, (4) Fondi i Investimit Raiffeisen Prestigj, (5) Fondi i Investimit Raiffeisen Vision, (6) Fondi i Investimit WVP Top Invest, (7) Fondi i Pensionit Vullnetar Raiffeisen, (8) Fondi i Pensionit Vullnetar Sigal.
- ç) Institucione të tjera publike si : (1) Agjencia Shtetërore e Kadastrës, (2) DPSHTRR, (3) D.P.Tatimeve, (4) M. Drejtësisë, (5) OSHEE, (6) QKB, (7) UKT.

19. Në përgjigje të kërkesave për informacion të Këshillit të Emërimeve në Drejtësi, të gjitha institucionet publike dhe subjektet private të treguara në pikën 18 më sipër, kanë dërguar pranë Këshillit përgjigjet përkatëse ku përmbahen të gjitha të dhënat e kërkuara mbi pasuritë e kandidatëve, nëse kanë pasur të tilla për secilin prej tyre, përfshirë edhe kandidatin Altin Binaj.

20. Gjithashtu, ky Këshill evidenton se në pikën 107 të Vendimit nr. 4, datë 11.03.2019, është përcaktuar se: *“Pavarësisht nga parashikimet e pikave 104 dhe 105 të këtij Vendimi, të gjithë këta kandidatë magistratë dhe subjekte të tjerë që i nënshtrohen procedurës së rivlerësimit kalimtar sipas ligjit nr. 84/2016, i nënshtrohen menjëherë procedurave të verifikimit të integritetit sipas ligjit nr. 45/2015”*.

21. Kurse në pikën 108 të Vendimit nr. 4, datë 11.03.2019 është përcaktuar se: *“Procedura e përcaktuar sipas nenit 236 të ligjit nr. 115/2016 për verifikimin e integritetit të kandidatëve magistratë dhe subjekteve të tjerë që i nënshtrohen procedurës së rivlerësimit kalimtar sipas ligjit nr. 84/2016, shtrihet për periudhën pas asaj të datës që ka marrë formë të prerë vendimi i dhënë nga organet e rivlerësimit kalimtar për konfirmimin e tyre në detyrë”*.

22. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikave 82, 107 dhe 108 të Vendimit të Këshillit të Emërimeve në Drejtësi nr. 4, datë 11.03.2019, me shkresën nr. 35 Prot., datë

30.01.2020, Këshilli ka dërguar në Prokurorinë e Përgjithshme për kompetencë formularin e vetëdeklarimit të plotësuar nga kandidati Altin Binaj sipas ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike” (në vijim ligji nr. 138/2015).

23. Prokuroria e Përgjithshme, me shkresën nr. 211/314 Prot., datë 02.06.2020, ka përcjellë pranë Këshillit të Emërimeve në Drejtësi, Vendimin datë 02.06.2020 “Për miratimin e rezultateve të verifikimit për subjektin Altin Binaj, me të cilën është vendosur miratimi i rezultateve si më poshtë vijon:

- a) *Nuk rezultoi të ketë kryer ndryshime në përbërësit e gjendjes civile të ndryshme nga ato të deklaruara në formular.*
- b) *Nuk rezultoi i dënuar me vendim të formës së prerë, për kryerjen e ndonjë vepre penale, nga autoritetet gjyqësore shqiptare.*
- c) *Nuk rezultoi i dënuar me vendim gjyqësor jo përfundimtar nga një autoritet gjyqësor shqiptar ose i huaj për një çështje penale të pazgjidhur me vendim gjyqësor të formës së prerë.*
- d) *Nuk rezultoi të ketë qenë i ndaluar apo arrestuar nga organet ligjzbatuese, për kryerjen e një vepre penale.*
- e) *Nuk rezultoi të ketë qenë i siguruar me ndonjë masë shtrënguese të sigurisë personale.*

24. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit të kandidatit Altin Binaj, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikës 84 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i është drejtuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve Drejtorisë së Sigurisë së Informacionit të Klasifikuar (shkresa nr. 37 Prot., datë 30.01.2020) dhe me kërkesë për informacion Shërbimit për Çështjet e Brendshme dhe Ankesat pranë Ministrisë së Brendshme (shkresa nr. 38 Prot., datë 30.01.2020).

25. Drejtoria e Sigurisë së Informacionit të Klasifikuar me aktin shkresor nr. 578 Prot., datë 28.02.2020, është përgjigjur se:

a) *Në përfundim të procedurave të verifikimit, nuk disponohen të dhëna/informacione që bien në kundërshtim me kërkesat e pikës 89 gërmat “a” dhe “c” për integritetin e figurës së z. Altin Binaj.*

26. Shërbimi për Çështjet e Brendshme dhe Ankesat pranë Ministrisë së Brendshme ka dërguar përgjigje, me shkresën nr. 360/4 Prot., datë 09.09.2020, nga ku rezulton se, në lidhje me kandidatin Altin Binaj:

- a) *Nuk është i regjistruar në strukturat e Policisë së Shtetit për veprimtari kriminale ose të administrohen të dhëna për kontakte të papërshtatshme.*
- b) *Edhe verifikimet e kryera në arkivat e Shërbimit për Çështjet e Brendshme dhe Ankesat, nuk rezulton se në ngarkim të kandidatit për gjyqtar të Gjykatës*

*Kushtetuese, të disponohen të dhëna apo materiale të procesit informativ për përfshirje në veprimtari të kundërligjshme.*

27. Gjithashtu, lidhur me verifikimin dhe kontrollin e integritetit, në zbatim të nenit 229 dhe 236 të ligjit nr. 115/2016, të dispozitave të ligjit nr. 45/2015 “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë” (në vijim ligji nr. 45/2015), si edhe në zbatim të pikës 85 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, me shkresën nr. 36 Prot., datë 30.01.2020, Këshilli ka dërguar formularin e aplikimit përkatës të plotësuar sipas ligjit nga kandidati Altin Binaj për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

28. Autoriteti për Informimin mbi Dokumentet e Ish-Sigurimit të Shtetit, me shkresën nr. 137/5 Prot., datë 17.02.2020, ka dërguar vendimin nr. 74, datë 13.02.2020 pranë Këshillit të Emërimeve në Drejtësi me rezultatet e kontrollit të ushtruar për kandidatin Altin Binaj, duke ardhur bë përfundimet se:

a) *Për zotin Altin Binaj, nga verifikimet e kryera deri tani nuk figurojnë të ketë materiale në dokumentet të ish- Sigurimit të Shtetit në emër të tyre, sipas Nenit 29, pika 2 të ligjit nr. 45/2015 “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”.*

29. Për verifikimin e kushteve dhe kriterëve ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të ligjit nr. 115/2016, si edhe në zbatim të pikave 91/93 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli ka shqyrtuar dokumentacionin përkatës të depozituar nga vetë kandidati Altin Binaj në momentin e kandidimit pranë organit të emërtesës që ka shpallur vendin vakant.

30. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati të mos ketë mbajtur pozicione drejtuese në parti politike gjatë 10 viteve të fundit nga data e kandidimit, Këshilli në datën 12.08.2020 i është drejtuar përsëri KQZ-së për listën e partive politike, si dhe në datën 02.07.2020, datën 20.08.2020 dhe datën 21.08.2020 i është drejtuar më kërkesë për informacion partive politike, duke i bashkëlidhur listat e të gjithë kandidatëve për gjyqtar në Gjykatën Kushtetuese. Në përgjigje të këtyre kërkesave, ato parti politike të cilat kanë kthyer përgjigje, kanë dërguar informacione lidhur me ekzistencën ose jo të të dhënave që do të vërtetonin angazhimin në ndonjë pozicion drejtues në parti politike të secilit prej kandidatëve, përfshirë edhe kandidatin Altin Binaj.

31. Gjithashtu për këtë rast kandidimi, Këshilli vlerësoi t'i drejtohet me kërkesa për informacion disa institucioneve publike, pranë të cilave kandidati Altin Binaj ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të kandidatit, konkretisht Këshillit të Lartë të Prokurorisë ku është kërkuar nëse kandidati ka marrë masë disiplinore gjatë ushtrimit të detyrës dha a ka masë disiplinore në fuqi (shkresa nr. 145 Prot., datë 09.07.2020);

Komisionit të Pavarur të Kualifikimit i është kërkuar vendimi i kandidatit dhe nëse ndaj këtij vendimi është ushtruar ankim apo jo pranë KPA-së (shkresa nr. 196 Prot., datë 20.08.2020).

32. Lidhur me të dhënat e kërkuara, Këshilli ka marrë përgjigje me shkrim nga Këshilli i Lartë i Prokurorisë, sipas të cilës për kandidatin Altin Binaj nuk ka kërkesë për fillim procedimi disiplinor, propozim me llojin e masës disiplinore që është gjykuar të merret ndaj tij, si dhe nuk rezulton të ketë vendim për marrjen e masës disiplinore, si gjatë kontrolleve të ushtruara të përgjithshme, tematike apo mbi bazë ankese (shkresa nr. 833/1 Prot., datë 01.09.2020); Komisioni i Pavarur i Kualifikimit ka konfirmuar se kandidati Altin Binaj është konfirmuar në detyrë me vendimin nr. 101, datë 21.01.2019, i cili ka marrë formë të prerë në datën 12.03.2019 (shkresa nr. 5544/1 Prot., datë 27.08.2020).

33. Në përfundim të veprimeve dhe procedurave të kontrollit dhe verifikimit, në zbatim të neneve 235, 236 dhe 237 të ligjit nr. 115/2016, si edhe të pikave 29, 75 dhe 87 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, anëtari i Këshillit relator i çështjes ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm dhe e ka dërguar çështjen për shqyrtim në mbledhjen e Këshillit.

34. Në zbatim të pikës 33 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, zv/Kryetari ka thirrur mbledhjen e Këshillit duke njoftuar anëtarët për zhvillimin e saj në datën 16.09.2020, ora 11:00, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë edhe çështja: Shqyrtimi i gjetjeve në procedurën e verifikimit për kandidatin Altin Binaj për vendin vakant, vakancë e parakohshme në Gjykatën Kushtetuese, e shpallur nga Presidenti i Republikës në datën 22.11.2019.

35. Në zbatim të pikës 34 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidatit Altin Binaj.

36. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

37. Për zhvillimin e mbledhjes së Këshillit në datën 16.09.2020, ora 11:00, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

38. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

39. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e



Avokatit të Popullit lidhur me mënyrën e procedimit të ndjekur për verifikimin e kandidatit Altin Binaj.

40. Avokati i Popullit, pasi ngriti disa pyetje për shtrirjen e periudhës së verifikimit pas përfundimit të procesit të vettingut, si edhe për shqyrtimin e formularit tip të plotësuar nga kandidati në lidhje me verifikimin e pasurisë, në thelb, nuk parashtrroi asnjë problematikë në lidhje me procedurën e ndjekur për verifikimin e kandidatit.

## **II. Vlerësimi i Këshillit të Emërimeve në Drejtësi**

41. Këshilli i Emërimeve në Drejtësi, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë në aktet që përmban dosja e kandidatit, vlerëson se duhet të procedojë me vendim “Për lejimin e kandidimit” të kandidatit Altin Binaj për vendin vakant në Gjykatën Kushtetuese, të shpallur nga Presidenti i Republikës në datën 22.11.2019.

42. Në pikën 4 dhe 5 të nenit 125 të Kushtetutës, parashikohet se:

*“4. Gjyqtarët e Gjykatës Kushtetuese duhet të kenë arsim të lartë juridik, të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, me një veprimtari të spikatur në fushën e së drejtës kushtetuese, të drejtave të njeriut ose në sfera të tjera të së drejtës.*

*5. Gjyqtari nuk duhet të ketë mbajtur funksione politike në administratën publike ose pozicione drejtuese në një parti politike gjatë 10 vjetëve të fundit përpara kandidimit. Kritere të tjera, si dhe procedura për emërimin dhe zgjedhjen e gjyqtarëve të Gjykatës Kushtetuese rregullohen me ligj.”*

43. Në pikën 1 dhe 2 të nenit 7/a të ligjit nr. 8577/2000 parashikohet se:

*“1. Gjyqtari i Gjykatës Kushtetuese mund të zgjidhet shtetasi shqiptar që përmbush këto kushte:*

*a) të ketë zotësi të plotë për të vepruar;*

*b) të ketë mbaruar arsimin e lartë juridik, Diplomë e Nivelit të Dytë;*

*c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;*

*ç) të mos jetë në procedim penal dhe të mos jetë dënuar me burgim për kryerjen e një vepre penale;*

*d) të mos jetë larguar nga detyra për shkaqe disiplinore dhe të mos ketë masë disiplinore në fuqi;*

*dh) të ketë kaluar me sukses procesin e kontrollit dhe verifikimit të pasurisë së tij personale dhe të familjarëve të tij, sipas ligjit.*

*2. Kandidati që përmbush kushtet e parashikuara në pikën 1 të këtij Neni, duhet të plotësojë edhe këto kritere:*

*a) të ketë përvojë pune jo më pak se 15 vjet si gjyqtar, prokuror, avokat, profesor ose lektor i së drejtës, jurist i nivelit të lartë në administratën publike;*

*b) të ketë një veprimtari të njohur në fushën e të drejtës kushtetuese, të drejtave të njeriut ose sfera të tjera të së drejtës;*

c) të jetë vlerësuar për aftësitë profesionale dhe integritetin etik e moral.”.

44. Për sa i përket procedurës së verifikimit të pasurisë dhe integritetit, Këshilli i Emërimeve në Drejtësi mban parasysh që me vendimin nr. 101, datë 23.01.2019 të Komisionit të Pavarur të Kualifikimit, subjekti i rivlerësimit Altin Binaj është konfirmuar në detyrë, vendim i cili ka marrë formë të prerë në datën 12.03.2019. Vendimet e Komisionit të Pavarur të Kualifikimit për konfirmimin në detyrë të subjekteve të rivlerësimit merren në përfundim të hetimit dhe shqyrtimit të gjetjeve për të tre komponentët e kontrollit: pasurinë, figurën (integritetin) dhe aftësitë profesionale. Për rrjedhojë, ky kandidat nuk gjendet në kushtet e ndalimit të kandidimit për sa i përket verifikimit të pasurisë dhe lidhur me verifikimin dhe kontrollin e integritetit.

45. Megjithatë ky Këshill, ashtu sikundër është pasqyruar në pikat 10-13 të vendimit, ka vijuar verifikimet dhe për sa i përket procedurës së verifikimit të pasurisë, në përfundim të veprimeve të kontrollit të ushtruar në zbatim të nenit 235 të ligjit nr. 115/2016, të ligjit nr. 9049/2003 dhe ligjit nr. 9367/2005, me shkresën nr. 130/25 Prot., datë 04.03.2020 ILDKPKI-ja, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidati Altin Binaj dhe personat e lidhur me të.

46. Në mënyrë të përmblodhur, referuar të dhënave të deklaratës së pasurisë dhe interesave private, kandidati ka deklaruar deri në datën 30.01.2020, si më poshtë:

- 1- Apartament banimi me sip. 102.2 m<sup>2</sup>, Igj. Isa Boletini , Vlorë, blerë në v. 2005, në vlerën 3.500.000 lekë. Rivlerësuar në v. 2013, në shumën 6.163.661 lekë. Zotërimi 100%, me bashkëshorten (trajtuar në vetting).
- 2 - Apartament banimi me sip. 56.2 m<sup>2</sup>, në Orikum Vlorë, blerë në v. 2013, në vlerën 15.000 euro. Zotërimi 100% b/shortja (trajtuar në vetting).
- 3- Automjet tip “Mercedez Benc” me targa AA504CP në vlerën 2.100 euro. Zotëron 50%.
- 4- Automjet tip “Nisan” viti i prodhimit 2014 me targa AA504 ZR, blerë nga kursimet e vitit 2019, në vlerën 9.000 euro. Zotëron 50 %.
- 5- Zyrë me sip. 42m<sup>2</sup>, për ushtrimin e aktivitetit privat të b/shortes. Vlera është 10.000 euro dhe 4.080.000 lekë. Zotëron 50%.
- 6- Likuiditet në cash, në shumën 1.000.000 lekë. Zotërimi 100% me bashkëshorten.
- 7- Kredi personale në Raiffeisen Bank, në v. 2012, në vlerën 815.000 lekë. Detyrimi i mbetur 64.451 lekë.
- 8- Marrëveshje huaje në llogari rrjedhëse (Overdraft), në BKT Bank, në vlerën 400.000 lekë e pakonsumuar. Detyrimi i mbetur 400.000 lekë.
- 9- Kontratë kredi bankare hipotekore, në shumën 4.080.000 lekë dhe afat 15 vjet. Detyrimi i mbetur është 3.579.614 lekë, deri më datë 31.12.2019.
- 10- Llogari page në BKT, në emër të subjektit në vlerën 1.596.421 lekë.
- 11- Depozitë në “Intesa SanPaolo Bank”, në emër të b/shortes, në vlerën 4.000 euro. (trajtuar në vetting).
- 12- Depozitë në ‘intesa SanPaolo Bank”, në emër të b/shortes, në vlerën 403.368 lekë. (trajtuar në vetting).
- 13- Llogari rrjedhëse në BKT, në emër të b/shortes, në vlerën 30 Usd.
- 14- Llogari rrjedhëse e personit fizik në euro në BKT Bank, me burim të ardhurat nga aktiviteti privat. Vlera është 7000 euro. Zotëron 100 %.
- 15- Llogari rrjedhëse e personit fizik në lekë, pranë Intesa SanPaolo Bank, me burim nga aktiviteti privat. Vlera është 56.000 lekë. Zotëron 100 %.

- 16- Kartë krediti, në Veneto Bank (mbi sigurimin e depozitës 400.000 lekë) në vlerën 360.000 lekë, kryer në vitet e mëparshme dhe shlyer tërësisht. Detyrimi është prej 0 lekë.
- 17- Apartament banimi në Vlorë, përfituar nga privatizimi, bashkëshortja zotëron 1/4 pjesë (*trajtuar në vetting*).
- 18- Kartë debiti në BKT Bank sha. në emër të Gerard Binaj në vlerën është 1.600 lekë.
- 19- 1/16 pjesë, (282m2) në emër të nënës së kandidatit në pasurinë e paluajtshme në fshatin “Qazim Pali”- Borsh, Sarandë, përfituar nga trashëgimia ligjore prej babait Josif Gjipali. Zotërimi 100% nëna e subjektit Efigjeni Binaj (*trajtuar në vetting*).

47. Vlera e pasurisë bruto është 10.581.389 lekë + 40.100 euro + 30 Usd. e konvertuar në vlerën rreth 15.485.000 lekë dhe rreth 11.905.000 lekë/neto.

- Subjekti/kandidati ka detyrime financiare në vlerën 3.579.614 lekë.
- Subjekti/kandidati ka kredi bankare konsumatore në vlerën rreth 64.451 lekë dhe overdraft në vlerën 400.000 lekë, e pakonsumuar. *Konvertuar me kursin e Bankës së Shqipërisë dt.30.1.2020.*

48. Nga analiza e të dhënave të deklaruara nga kandidati me informacionet e ardhura nga institucionet e specializuara, në mënyrë të përmbledhur, rezultoi se:

- Në Deklaratën e Pasurisë dhe Interesave Private të kandidatit për pozicione të ndryshme në institucionet e sistemit të drejtësisë, pasuria totale është deklaruar bruto rreth 15.485.000 lekë dhe rreth 11.905.000 lekë/neto.
- Në Deklaratën e Pasurisë Vetting, pasuria totale është deklaruar bruto rreth 8.241.000 lekë, dhe neto rreth 7.809.000 lekë.
- Ndryshimi i pasurisë nga Deklarata e Pasurisë Vetting deri në Deklaratën e Pasurisë dhe Interesave Privatë të kandidatit, rezulton me shtesë bruto rreth 7.244.000 lekë dhe neto 4096.000 lekë.
- Të ardhurat nga pagat e subjektit, pensioni i nënës dhe fitimi nga aktiviteti privat si avokate e b/shortes për periudhën 2017 - 30.01.2020, janë në vlerën totale rreth 12.057.000 lekë.
- Për periudhën Janar 2017 - 30.01.2020, referuar treguesve statistikorë të INSTAT, janë shpenzuar minimalisht për konsum familjar rreth 3.637.000 lekë.
- Shpenzimet për shkollimin e fëmijëve dhe pushime për periudhën 2017 - 2018 janë në vlerën rreth 1.474.000 lekë.

49. Në përfundim të veprimeve verifikuese të kryera në përputhje me ligjin nr. 9049/2003, për periudhën nga data 31.01.2017 deri më 30.01.2020 që përfshin deklaratat e interesave private Periodik Vjetor 2017, Periodik Vjetor 2018, Periodik Vjetor 2019 dhe deklaratën e pasurisë së kandidatit, konstatohet se për subjektin/kandidatin Altin Binaj:

- a) Deklarimi është i saktë në përputhje me ligjin.
- b) Ka burime financiare të ligjshme për të justifikuar pasurinë.
- c) Nuk ka kryer fshehje të pasurisë.
- ç) Nuk ka kryer deklarim të rremë.
- d) Nuk gjendet në situatën e konfliktit të interesave.

50. Këshilli i Emërimeve në Drejtësi verifikoi përputhshmërinë e të dhënave të deklaruara nga kandidati Altin Binaj në Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë, që ka depozituar pranë ILDKPKI-së, mbi bazën e të cilave ky institucion ka realizuar analizën financiare dhe ka ardhur në përfundimet e tij, në raport me të dhënat që rezultojnë nga informacionet e dërguara pranë Këshillit nga institucionet publike dhe private të treguara në pikën 18 të këtij Vendimi.

51. Mbi bazën e verifikimeve të kryera, Këshillit i rezulton se nuk ka gjetje që tregojnë të dhëna të padeklaruara apo mospërputhje të tyre me të dhënat e treguara në deklaratimet e bëra nga kandidati Altin Binaj pranë ILDKPKI-së me Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë.

52. Gjithashtu, Këshilli e vlerësoi të plotë dhe ezaurues, sipas kërkesave të legjislacionit në fuqi, hetimin e thelluar dhe analizat e hollësishme financiare të realizuara nga ILDKPKI-ja, sikurse edhe përfundimet e këtij institucioni mbi kontrollin e pasurisë dhe interesave private të kandidati Altin Binaj.

53. Për këto arsye, në zbatim të shkronjës “dh” të pikës 1 të nenit 7/a të ligjit nr. 8577/2000 dhe të nenit 235 të ligjit nr. 115/2016, Këshilli vjen në përfundimin se kandidati Altin Binaj ka *“kaluar me sukses procesin e kontrollit dhe verifikimit të pasurisë së tij personale dhe të familjarëve të tij”*. Për rrjedhojë, në zbatim të nenit 235 të ligjit nr. 115/2016, ky kandidat nuk gjendet në kushtet e ndalimit të kandidimit për sa i përket verifikimit të pasurisë.

54. Lidhur me verifikimin dhe kontrollin e integritetit, ashtu sikundër është pasqyruar në pikat 22-28 të vendimit, kandidati Altin Binaj ka dorëzuar në afat formularin e vetëdeklarimit sipas ligjit nr. 138/2015, të cilin Këshilli ia ka përcjellë për verifikim dhe kompetencë sipas ligjit Prokurorisë së Përgjithshme.

55. Prokuroria e Përgjithshme, me shkresën nr. 211/314 Prot., datë 02.06.2020, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Altin Binaj. Me vendimin “Për miratimin e rezultateve të verifikimit për subjektin Altin Binaj”, datë 02.06.2020 është vendosur të miratohen rezultatet e verifikimit si më poshtë:

- a) *Nuk rezultoi të ketë kryer ndryshime në përbërësit e gjendjes civile të ndryshme nga ato të deklaruara në formular.*
- b) *Nuk rezultoi i dënuar me vendim të formës së prerë, për kryerjen e ndonjë vepre penale, nga autoritetet gjyqësore shqiptare.*
- c) *Nuk rezultoi i dënuar me vendim gjyqësor jo përfundimtar nga një autoritet gjyqësor shqiptar ose i huaj për një çështje penale të pazgjidhur me vendim gjyqësor të formës së prerë.*
- d) *Nuk rezultoi të ketë qenë i ndaluar apo arrestuar nga organet ligjzbatuese, për kryerjen e një vepre penale.*
- e) *Nuk rezultoi të ketë qenë i siguruar me ndonjë masë shtrënguese të sigurisë personale.*

56. Nisur nga rezultatet e kontrollit të ushtruar nga Prokuroria e Përgjithshme sipas ligjit, Këshilli vjen në përfundimin se kandidati Altin Binaj, krahas plotësimit të saktë të formularit të vetëdeklarimit, përmbush kushtin e parashikuar nga shkronja “ç” e nenit 7/a të ligjit nr. 8577/2000, pra që kandidati të mos jetë në procedim penal dhe të mos jetë dënuar me burgim

për kryerjen e një vepre penale. Për rrjedhojë, lidhur me këtë kriter, në zbatim të nenit 236 të ligjit nr. 115/2016, ky kandidat nuk gjendet në kushtet që mund të sjellin ndalimin e kandidimit.

57. Në vijim të procedurave të verifikimit të integritetit, kandidati Altin Binaj ka dorëzuar në afat formularin e aplikimit “Për informim përpara emërimit/zgjedhjes në poste të larta” parashikuar në ligjin nr. 45/2015, të cilin Këshilli ia ka përcjellë për verifikim dhe kompetencë sipas ligjit Autoritetit për Informimin mbi Dokumentet e Ish-Sigurimit të Shtetit.

58. Autoriteti për Informimin mbi Dokumentet e Ish-Sigurimit të Shtetit, me shkresën nr. 137/5 Prot., datë 17.02.2020, ka dërguar pranë Këshillit të Emërimeve në Drejtësi vendimin nr. 74, datë 13.02.2020 me të cilën është miratuar përfundimi se:

a) *Për zotën Altin Binaj, nga verifikimet e kryera deri tani nuk figurojnë të ketë materiale në dokumentet të ish- Sigurimit të Shtetit në emër të tyre, sipas nenit 29, pika 2 të ligjit nr.45/2015 “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”.*

59. Nisur nga rezultatet e kontrollit të ushtruar nga Autoriteti për Informimin mbi Dokumentet e Ish-Sigurimit të Shtetit, Këshilli vjen në përfundimin se kandidati Altin Binaj, krahas plotësimit të saktë të formularit përkatës të aplikimit, përmbush kushtet e parashikuara nga ligji nr. 45/2015 për pastërtinë e figurës së funksionarit kushtetues në lidhje me sjelljen dhe veprimtarinë tij përpara muajit korrik 1991. Për rrjedhojë, lidhur me këtë kriter, në zbatim të nenit 236 të ligjit nr. 115/2016, ky kandidat nuk gjendet në kushtet që mund të sjellin ndalimin e kandidimit.

60. Gjithashtu, Këshilli i Emërimeve në Drejtësi verifikoi, nëpërmjet informacionit të sjellë sipas ligjit nga organe kompetente ligjzbatuese si Drejtoria e Sigurimit të Informacionit të Klasifikuar dhe Shërbimi i Kontrollit të Çështjeve të Brendshme dhe Ankesave pranë Ministrisë së Brendshme, nëse kandidati Altin Binaj “ka lidhje ose kontakte të papërshtatshme me personat e përfshirë në krimin e organizuar ose me persona të dyshuar të krimit të organizuar”. Ky verifikim përbën standardin kushtetues dhe ligjor tashmë të vendosur për figurën dhe integritetin e funksionarëve kushtetues të sistemit të drejtësisë, përpara zgjedhjes dhe gjatë ushtrimit të funksionit, pas ndryshimeve të Kushtetutës në vitin 2016, duke pasur parasysh ato të përcaktuara edhe në nenin DH të Aneksit të Kushtetutës, si edhe në ligjet e tjera të nxjerra në pajtim me të, përfshirë ligjin nr. 84/2016, pra mbi të njëjtat standarde dhe interpretim të këtij kriteri në procesin e rivlerësimit kalimtar të gjyqtarëve dhe prokurorëve.

61. Shërbimi për Çështjet e Brendshme dhe Ankesat pranë Ministrisë së Brendshme ka dërguar përgjigje, me shkresën nr. 360/4 Prot., datë 09.09.2020, nga ku rezulton se, në lidhje me kandidatin Altin Binaj:

- a) *Nuk është i regjistruar në strukturat e Policisë së Shtetit për veprimtari kriminale ose të administrohen të dhëna për kontakte të papërshtatshme.*
- b) *Edhe verifikimet e kryera në arkivat e Shërbimit për Çështjet e Brendshme dhe Ankesat, nuk rezulton se në ngarkim të kandidatit për gjyqtar të Gjykatës Kushtetuese, të disponohen të dhëna apo materiale të procesit informativ për përfshirje në veprimtari të kundërligjshme.*

62. Drejtoria e Sigurimit të Informacionit të Klasifikuar, me shkresën nr. 578 Prot., datë 28.02.2020, ka përcjellë pranë Këshillit të Emërimeve në Drejtësi informacionin e klasifikuar e të përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara në pikën më sipër, nga ku rezulton se, në lidhje me kandidatin Altin Binaj:

*a) Në përfundim të procedurave të verifikimit, nuk disponohen të dhëna/informacione që bien në kundërshtim me kërkesat e pikës 89 gërmat "a" dhe "c" për integritetin e figurës së z. Altin Binaj.*

63. Këshilli i Emërimeve në Drejtësi, bazuar në njohjen dhe shqyrtimin e informacionit të klasifikuar të dërguar nga agjencitë ligjzbatuese, vjen në përfundimin se, edhe për këtë kriter, në zbatim të nenit 236 të ligjit nr. 115/2016, kandidati Altin Binaj nuk gjendet në kushtet që mund të sjellin ndalimin e kandidimit.

64. Për verifikimin e kushteve dhe kriterëve të tjera ligjore të kandidimit, në zbatim të shkronjave "b", "c" dhe "d" të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4, datë 11.03.2019 "*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*", Këshilli shqyrtoi dokumentacionin e depozituar nga vetë kandidati Altin Binaj në momentin e kandidimit pranë organit të emërtesës që ka shpallur vendin vakant, shpjegimet dhe dokumentet shtesë të paraqitura nga kandidati mbi kërkesën e Këshillit, si edhe përgjigjet nga informacionet e kërkuara nga institucionet publike dhe subjektet private ku kandidati ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të tij.

65. Në lidhje me kushtin e kandidimit të parashikuar nga pika 4 e nenit 125 të Kushtetutës dhe shkronja "b" e pikës 1 të nenit 7/a të ligjit nr. 8577/2000, pra që kandidati të ketë mbaruar arsimin e lartë juridik, Diplomë e Nivelit të Dytë, nga dokumentacioni i shqyrtuar rezulton se kandidati Altin Binaj ka përfunduar studimet dhe është diplomuar në vitin 1988-1992 si Jurist, në Fakultetin e Drejtësisë të Universitetit të Tiranës. Në zbatim të ligjit nr. 80/2015 "*Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë*" ky lloj arsimimi kualifikohet si arsim i lartë juridik, Diplomë e Nivelit të Dytë. Për rrjedhojë, kandidati Altin Binaj nuk gjendet në kushtet e ndalimit të kandidimit sipas dispozitave të sipërcituara.

66. Lidhur me kushtin e kandidimit të parashikuar nga pika 4 e nenit 125 të Kushtetutës dhe shkronja "a" e pikës 2 të nenit 7/a të ligjit nr. 8577/2000, pra që kandidati të ketë të paktën 15 vjet përvojë pune si gjyqtar, prokuror, avokat, profesor ose lektor i së drejtës, nëpunës i nivelit të lartë në administratën publike, nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, ndërmjet të tjerave, rezulton se kandidati Altin Binaj ka ushtruar veprimtari profesionale si:

*a) Hetues, për periudhën "01.08.1992 – 24.12.1997", në Prokurorinë e Rrethit Vlorë.*

*b) Prokuror, për periudhën "24.12.1997-28.01.2008", në Prokurorinë e Rrethit Gjyqësor Vlorë.*

c) Prokuror dhe drejtues, për periudhën “28.01.2008 – 20.03.2010”, në Prokurorinë e Rrethit Gjirokastrë.

ç) Prokuror dhe drejtues, për periudhën “25.03.2010 – 28.05.2013”, në Prokurorinë e Rrethit Gjirokastrë.

d) Prokuror, për periudhën “28.05.2013 – 28.07.2016”, në Prokurorinë e Përgjithshme Tiranë.

e) Prokuror dhe drejtues, për periudhën “28.07.2016 e në vijim”, në Prokurorinë e Apelit Vlorë.

67. Bazuar në gjetjet e cituara në pikën më sipër, Këshilli konstaton se kandidati Altin Binaj ka ushtruar së paku për 15 vjet veprimtari profesionale nga ato të parashikuara si kusht për lejimin e kandidimit nga pika 4 e nenit 125 të Kushtetutës dhe shkronja “a” e pikës 2 të nenit 7/a të ligjit nr. 8577/2000.

68. Për sa i përket kushtit të kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati të mos ketë ushtruar funksione politike në administratën publike gjatë 10 viteve të fundit nga data e kandidimit, sikurse parashtrohet në pikën më sipër, si edhe nga jetëshkrimi dhe aktet e administruara në dosjen e kandidimit për veprimtaritë e tjera të ushtruara, Këshilli konstaton se kandidati Altin Binaj nuk ka ushtruar funksione politike në administratën publike (gjatë 10 viteve të fundit të kandidimit). Për rrjedhojë, kandidati Altin Binaj nuk gjendet në kushtet e ndalimit të kandidimit sipas dispozitave të sipërcituara.

69. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati të mos ketë mbajtur pozicione drejtuese në parti politike gjatë 10 viteve të fundit nga data e kandidimit, nga shqyrtimi i jetëshkrimit dhe të dhënave që rezultojnë nga aktet e administruara në dosjen e kandidimit, sikurse janë korrespondenca me partitë politike, Këshilli konstaton se kandidati Altin Binaj nuk ka mbajtur pozicione drejtuese në parti politike (gjatë 10 viteve të fundit nga data e kandidimit). Për rrjedhojë, kandidati Altin Binaj nuk gjendet në kushtet e ndalimit të kandidimit sipas dispozitave të sipërcituara.

70. Në shkronjën “d” të pikës 1 të nenit 7/a të ligjit nr. 8577/2000, si kusht kandidimi përcaktohet që kandidati të mos jetë larguar nga detyra për shkaqe disiplinore dhe të mos ketë masë disiplinore në fuqi. Nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, Këshilli konstaton se kandidati Altin Binaj nuk rezulton të jetë larguar nga detyra për shkaqe disiplinore. Po kështu, nuk rezulton që kandidati të ketë masa disiplinore në fuqi. Për rrjedhojë, kandidati Altin Binaj nuk gjendet në kushtet e ndalimit të kandidimit sipas kësaj dispozite.

71. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacioni që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi vjen në përfundimin se duhet të vendoset lejimi i kandidimit të kandidatit Altin Binaj, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 22.11.2019.

## **PËR KËTO ARSYE:**

Në mbështetje të pikës 1 të nenit 149/d dhe nenit 125 të Kushtetutës, të neneve 7/a dhe 7/b të ligjit nr. 8577, datë 10.02.2000 “Për organizimin dhe funksionimin e Gjykatës Kushtetuese të Republikës së Shqipërisë”, të pikës 3 të nenit 229, pikës 4 të nenit 235, pikës 5 të nenit 236 dhe pikës 3 të nenit 237 të ligjit nr. 115/2016 “Për organet e qeverisjes së sistemit të drejtësisë”, si edhe të shkronjës “a” të pikës 50 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi,

## **VENDOSI:**

1. Lejimin e kandidimit të kandidatit Altin Binaj, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 22.11.2019.
2. Në zbatim të nenit 238 të ligjit nr. 115/2016, ky vendim i njoftohet kandidatit Altin Binaj.
3. Kandidati Altin Binaj ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

**ZËVENDËSKRYETARE**

**Vitore TUSHI**

